

**Amra Rešidbegović**  
amreresidbegov@gmail.com

**Biserka Sabljaković**  
biserkabic@hotmail.com

Asocijacija informacijskih stručnjaka BAM

Прегледни чланак  
UDK 02+069+930.25]:061.2(497.6)  
"2006/2016"

## DECENIJA POSLANSTVA ASOCIJACIJE INFORMACIJSKIH STRUČNJAKA – BIBLIOTEKARA, ARHIVISTA I MUZEologa U BOSNI I HERCEGOVINI

**Sažetak:** Rad donosi pregled djelovanja Asocijacije informacijskih stručnjaka – bibliotekara, arhivista i muzeologa tokom prve dekade postojanja. Predstavljani su razlozi osnivanja, misija, vizija, aktivnosti, uvid u organizaciju Asocijacije BAM, dokumenti, članstvo i rezultati tokom perioda koji je obilježen aktivnošću bibliotekara, osnivača Asocijacije BAM. Ustanovili su je i vodili bibliotekari od 2006. do 2016. godine, kada je povjerena na vođenje muzejskim djelatnicima.

**Ključne riječi:** asocijacija, informacijski stručnjaci, bibliotekari, arhivisti, muzeolozi.

### Uvod

„Biblioteke, arhivi i muzeji (BAM) su temeljne informacijske institucije namijenjene svim ljudima. U 21. stoljeću, vremenu globalizacije, novih tehnologija i vremenu neograničene i nezasićene potrebe za znanjem, Biblioteke, arhivi i muzeji dobijaju na značaju, ali istovremeno i nove, složenije i veće obaveze koje pred njih stavljaju konzumenti, sve više e-informacija. Novo promišljanje o ispunjavanju veoma složenih, univerzalnih obaveza prema informacijskom e-okruženju, okupilo je informacijske stručnjake iz biblioteka, arhiva i muzeja sa jedinstvenom željom: da obnove infrastrukturu široke informacijske zajednice; da potaknu međusobnu komunikaciju unutar ova tri domena i van njih; da izgrade jedinstveni, otvoreni informacijski sistem u Bosni i Hercegovini. Tako je formirana Asocijacija informacijskih stručnjaka: bibliotekara, arhivi-

sta i muzeologa BAM, čija su vizija, misija i ciljevi namijenjeni vama, vašem prosperitetu i boljem životu, pa vas pozivamo da nam se na ovom dobrom putu pridružite.”

Iz ovog poziva na saradnju i poruke tadašnje predsjednice Asocijacije BAM vidljivo je da ni desetkovanje stručnih kadrova i zbirki tokom rata u BiH (1992–1995), niti gašenje bosanskohercegovačkih kulturnih institucija i profesionalnih udruženja tada i nakon rata nisu ugasili profesionalni žar kulturnih djelatnika za poticanjem svijesti o neminovnosti njihove obnove i razvoja komunikacije među informacijskim djelatnicima u najširem smislu. Novo, složeno, zahtjevno informacijsko doba zateklo nas je na ruševinama kuća, opreme i sistema na kojima su počivale naše djelatnosti, ali i snažno nas potaklo i ojačalo potrebu da nadalje ozbiljno štitimo ono što je ostalo, da se uključimo u moderne tokove profesionalnog života i okrenemo budućnosti.

Otvoreni dijalog među zastupnicima naizgled različitih domena – bibliotekara, arhivista i muzeologa odredio je temeljnu zajedničku misiju da stratišta ponovo pretvori u dobra mjesta za učenje, komunikaciju, razmjenu i promociju ideja i postignuća za sve ljude. Tako su i svi naši dokumenti, (*Statut, Etički kodeks, pravilnici i publikacije – zbornici radova, Bilten, Edicija povremenih prijevoda*) temeljeni na principima intelektualne slobode, otvorenosti, promoviranja cjeloživotnog učenja, zalaganja za reputaciju struke.

Uloga baštinika i čuvara veoma vrijednog i rijetko koloritnog kulturnog naslijeđa nalagala je da prioritet u sprovođenju složenog strateškog plana Asocijacije BAM bude zaštita svih formi bosanskohercegovačke baštine i vrijednosti same informacijske struke. Kao aktivni učesnici u projektima Evropske komisije ICT poznatim pod imenima Pulman i Calimera bili smo inspirirani smjernicama projekata koji su ukazivali na prednost primjene novih tehnologija, posebno digitalizacije i digitalnih usluga prilagođenih novim, usloženjenim korisničkim potrebama. Ostvarenju ovih ciljeva išla je u prilog i struktura Asocijacije BAM koju su činili kulturni poslenici opskrbljeni dragocjenim stručnim iskustvom i novi profesionalni naraštaji obučeni informacijsko-tehnološkim vještinama. Put znanja, informacija, novih tehnologija, interneta, otvorenosti i komunikacije za bibliotekare, arhiviste i muzeologe je bio otvoren.

Prvu deceniju života Asocijacije BAM (2006–2016) obilježili su bibliotekari. To je iz više razloga bilo i prirodno i pored nesumnjivo značajnog doprinosa i podrške koje je u tom periodu konstantno davao i manji dio članstva – arhivisti i muzeolozi. Bibliotekari su činili najbrojniji dio članstva Asocijacije BAM; kao najveći gubitnici svoje infrastrukture bili su najmotiviraniji da se reorganiziraju i moderniziraju u skladu sa zahtjevima 21. stoljeća; a strukovno udruženje Društvo bibliotekara Bosne i Hercegovine se nakon skoro šest decenija ugasilo. Bibli-

oteke i bibliotekare BiH je vrijeme blagovremenog i prirodnog ulaska u e-doba zaobišlo i oni su se, u velikom skoku, odjednom našli u potpuno novom svijetu. O savlađivanju tog vremenskog jaza, prilagodbi, razvoju i postignućima najbolje svjedoče teme, pod teme i rezultati naših godišnjih međunarodnih konferencija održanih u prostorima biblioteka, arhiva, muzeja i instituta, među dokumentarnom građom i muzejskim eksponatima. Okvirna tema svake konferencije je bila Evropske smjernice za saradnju biblioteka, arhiva i muzeja sa brojnim aktualnim podtemama. U prijateljskoj atmosferi, ozračju umjetničkog programa, prigodnih izložbi i predstavljanja najljepših primjera kulturne baštine, izlagani su primjeri dobre prakse i svjetskih dostignuća, doneseni korisni zaključci i sugestije. Uspjehe svojih međunarodnih konferencija prve dekade rada Asocijacija BAM dijeli sa svim učesnicima iz prestižnih kulturnih institucija BiH, Hrvatske, Srbije, Crne Gore, Slovenije, Makedonije, Velike Britanije, Amerike, Njemačke, Holandije, Mađarske, Estonije, Rumunije, Francuske i Italije.

### Osnivanje i rad Asocijacije BAM

Aktivnosti na formiranju Asocijacije informacijskih stručnjaka – bibliotekara, arhivista i muzeologa (BAM) počele su krajem 2005. godine i vezane su za promjene koje su nastale u zbližavanju baštinskih institucija. Sa razvojem savremenih informacijsko-komunikacijskih tehnologija i mogućnostima koje one pružaju sličnosti među tim institucijama postaju još očiglednije, a potreba za njihovim zajedničkim djelovanjem postaje uslov za zadovoljavanje različitih potreba korisnika. S obzirom na to da je Društvo bibliotekara BiH postepeno prestalo sa radom, konstantno se osjećala potreba za strukovnim djelovanjem. DBBiH je od svog osnivanja 1949. godine sve do donošenja novog *Zakona o udruženjima građana BiH* u 2001. godini radilo u kontinuitetu, pa čak i tokom rata 1992–1995. godine. Zbog nemogućnosti preregistracije DBBiH po novom Zakonu (2001), a i nedovoljne angažovanosti tadašnjeg rukovodstva i članstva, Društvo bibliotekara je postepeno prestalo sa radom, tačnije 2003. godine.

Na inicijativu dvadesetak najaktivnijih članova, prvenstveno Sekcije za fakultetske i specijalne biblioteke DBBiH koja je i u tom periodu bila aktivna (radni sastanci 2003. i 2005. godine) dogovoreno je da se krene sa osnivanjem profesionalnog udruženja. U decembru 2005. godine u biblioteci Opće bolnice „Abdulah Nakaš” u Sarajevu, održan je Okrugli sto na temu Nabavna politika u bibliotekama, u organizaciji Sekcije za fakultetske i specijalne biblioteke nekadašnjeg DBBiH i tom prilikom nastala je ideja o formiranju strukovnog udruženja bibliotekara, arhivista i muzealaca. Po formiranju Asocijacije BAM

Sekcija za fakultetske i specijalne biblioteke DBBiH nastavila je raditi kao Sekcija Asocijacije BAM. Može se reći da je do danas ostala najaktivnija Sekcija BAM-a.

Osnivačka skupština Asocijacije BAM je održana u Sarajevu u biblioteci Opće bolnice „Abdulah Nakaš” u februaru 2006. godine, a upisana je u Registar udruženja Ministarstva pravde Bosne i Hercegovine u maju 2006. godine. Potpisnici osnivačkog akta su bibliotekari: Ferida Bogučanin, Nataša Filatov, Munevera Hasanbegović, Saša Madacki, Nataša Milićević, Senija Mujić, Nihada Muratović, Ljubica Rebić, Fikreta Resić, Amra Rešidbegović, Biserka Sabljaković i Vaska Sotirov Đukić.

Asocijacija BAM je registrirana da djeluje na teritoriji BiH u skladu sa *Rješenjem Ministarstva pravde Bosne i Hercegovine*. Glavni cilj djelovanja Asocijacije je rad na uspostavljanju bliže saradnje između biblioteka, arhiva i muzeja u Bosni i Hercegovini, širenje naučne i stručne misli, podsticanje međunarodne saradnje, kako bi se provela zaštita, dostupnost, istraživanje, promocija i širenje informacija o kulturnoj i naučnoj baštini uz primjenu novih tehnologija i međunarodnih standarda.




*Osnivačka skupština, biblioteka Opće bolnice „Abdulah Nakaš”,  
februar 2006. godine*

**Misija** Asocijacije BAM je da ukaže na primjere dobre prakse u svijetu i u Bosni i Hercegovini, da izdvoji i kritički predstavi najuspješnije inicijative,

metodologije, te projekte koji su doveli do značajnih rezultata digitalizacije kulturne i naučne baštine.

**Vizija** Asocijacije BAM je stvaranje kvalitetnog digitalnog sadržaja u Bosni i Hercegovini, poboljšanje kvalitete usluga baštinskih institucija, kao i unapređenje razmjene iskustava i znanja unutar informacijskih znanosti, te informacijske djelatnosti.



Asocijacija informacijskih stručnjaka - bibliotekara, arhivista i muzeologa  
Association of Information Professionals - Librarians, Archivists and Museologists

## Etički kodeks

Bibliotekari, arhivisti, muzeolozi i informacijski stručnjaci, koji su članovi Asocijacije BAM, moraju djelovati u skladu sa etičkim principima utvrđenim ovim kodeksom ponašanja kako bi postao dio njihovog profesionalnog identiteta. Oni ne mogu biti profesionalno angažirani u organizacijama čije su aktivnosti i ciljevi u suprotnosti sa ovim etičkim principima. Asocijacija BAM i njeni članovi su odlučni da djeluju prema Etičkom kodeksu i da se javno izjasne za ove etičke principe unutar svoje struke i institucije u kojoj rade.

Svrha Etičkog kodeksa je da osigura okvir djelovanja koji će pomoći članovima Asocijacije BAM, da lakše upravljaju zadacima, odgovornostima i izazovima kojima su izloženi u svom radu, a odnose se na profesionalno ponašanje.

Kao članovi Asocijacije BAM, izjašnjavam se da ćemo djelovati u skladu sa Etičkim kodeksom:

- Mi podržavamo principe intelektualne slobode i protivimo se svim oblicima cenzure. Mi ohrabrujemo neovisno oblikovanje mišljenja i slobodan protok informacija kao i postojanje informacijskih usluga sa mogućnostima slobodnog pristupa svim vrstama informacija.
- Mi prepoznajemo i poštujemo prava intelektualnog vlasništva i copyrighta, integritet informacijskih proizvoda i intelektualni napor onih koji su ih kreirali.
- Mi štitimo prava na privatnost i tajnost svakog pojedinačnog korisnika koji traži informacije, prima ih, pretražuje, posuđuje, nabavlja ili prenosi.
- Mi nudimo visoko kvalitetne usluge svim našim korisnicima, bez obzira na njihovo nacionalno porijeklo, rasu, dob, društveni status, vjeru, spol ili seksualnu orijentaciju.
- Mi snosimo punu materijalnu i moralnu odgovornost za svoje djelovanje, te pružamo samo provjerene i tačne informacije korisnicima.
- Mi brinemo za dobru reputaciju informacijske struke.
- Mi brinemo za konzervaciju i zaštitu naše kulturne i naučne baštine u svim oblicima za buduće generacije.
- Mi podržavamo nauku i istraživački rad promovišući i ostvarujući otvoren pristup naučnim informacijama.
- Mi se obavežujemo na održavanje i poboljšanje ličnog stručnog znanja, vještina i sposobnosti, te principa doživotnog učenja.
- Mi se zalažemo za partnerske odnose na svim nivoima.
- Mi poštujemo vještine i sposobnosti drugih, bez obzira da li su informacijski stručnjaci ili korisnici, zaposlenici ili kolege.
- Mi zastupamo profesionalnu neovisnost, poštovanje, iskrenost, otvorenost za saradnju i kritičku lojalnost koja određuje naše uzajamno djelovanje, kao i djelovanje prema nadređenim autoritetima.

Poštivanje ovog kodeksa je moralna obaveza i profesionalna dužnost svih članova Asocijacije BAM. Disciplinski postupak će biti poduzet za one članove koji se budu profesionalno nedolično ponašali ili djelovali u suprotnosti sa gore iznesenim etičkim principima.

*Etički kodeks bibliotekara, arhivista i muzeologa  
usvojen je na 1. skupštini Asocijacije BAM  
Sarajevo, 15. juni 2007.godina*

o/o Ekonomski fakultet, Trg oslobođenja - Alija Izetbegović 1  
71000 Sarajevo, Bosna i Hercegovina  
Tel.: +387 (0)33 275 313 Tel./Fax: +387 (0)33 275 969 E-mail: [bam@bam.ba](mailto:bam@bam.ba) Website: <http://www.bam.ba>  
Transakcijski račun: (KM) 3330200260592158 Devizni račun: 3330604018484354 UniCredit Bank

## Etički kodeks Asocijacije BAM

Prva predsjednica Asocijacije BAM je Amra Rešidbegović (NUBBiH), generalni sekretar Biserka Sabljaković (Ekonomski fakultet UNSA), a članovi Upravnog odbora (2006–2010) bili su: Amra Rešidbegović, Senija Mujić (Filozof-

ski fakultet UNSA), Munevera Hasanbegović (PMFUNSA), Vaska Sotirov-Đukić (Biblioteka Sarajeva) i Nataša Filatov (Opća bolnica „Abdulah Nakaš“).

Prvi počasni član Asocijacije BAM je prof. dr Kemal Bakaršić (Filozofski fakultet UNSA) – Odlukom Upravnog odbora od 18. 5. 2006. godine.

Etički kodeks Asocijacije BAM usvojen je na Godišnjoj skupštini 2007. godine koja je održana na Ekonomskom fakultetu u Sarajevu.

Na izornoj skupštini Asocijacije BAM koja je održana na Filozofskom fakultetu u Sarajevu 2010. godine ponovo je za predsjednicu izabrana Amra Rešidbegović, a za generalnog sekretara Biserka Sabljaković.

Za članove Upravnog odbora (2010–2016) tada su izabrani: Amina Rizvanbegović-Džuvic (Bošnjački institut Fondacija Adila Zulfikarpašića), Lejla Kodrić Zaimović (Filozofski fakultet UNSA), Dražen Kotrošan (Zemaljski muzej BiH), Nihada Muratović (Četvrta gimnazija, Sarajevo) i Amra Rešidbegović.



*Učesnici Izborne skupštine na Šumarskom fakultetu u Sarajevu,  
februar 2016 godine*

Na Godišnjoj izornoj skupštini Asocijacije BAM koja je održana na Šumarskom fakultetu u Sarajevu u februaru 2016. godine u novo rukovodstvo (2016–2020) izabrani su: Predsjednica Asocijacije BAM Azra Bečević-Šarenkapa (Zemaljski muzej BiH), Generalni sekretar Narcisa Rastoder (Ekonomski fakultet UNSA), a u Upravni odbor: Azra Bečević-Šarenkapa, Amina Rizvanbegović-Džuvic, Izet Šabotić (Filozofski fakultet Univerziteta u Tuzli), Asim Krhan (Muzej Hercegovine, Mostar) i Nihada Muratović.

Poslovna tajnica Asocijacije BAM od 2008. do 2016. godine bila je Nadina Grebović-Lendo (Filozofski fakultet UNSA).

Organi rada/upravljanja Asocijacije BAM su: Skupština, Predsjednik, Upravni odbor, Generalni sekretar, Etički odbor i Sekcije.

### **Izdavačka djelatnost Asocijacije BAM**

U okviru izdavačke djelatnosti objavljene su sljedeće publikacije u elektronskoj i printanoj formi:

- Bilten *BAM info* (tri broja)
- Zbornik radova sa BAM konferencija (9 zbornika)
- Edicija povremenih prijevoda (tri publikacije)
- Prijevod međunarodnog standarda BAS ISO 690
- Bibliografija radova Zbornika radova BAM konferencija (2006–2014) u COBISS-u

Svi zbornici BAM konferencija su indeksirani u bazama podataka CEEOL i EBSCO.

### **BAM aktivnosti u proteklom desetogodišnjem radu**

U proteklom periodu BAM je djelovao pridržavajući se plana rada i strategije razvoja u skladu sa mogućnostima. U redovnoj komunikaciji (e-mail, telefon i dr.) i na radnim sastancima pripremani su prijedlozi i primjedbe na nacрте relevantnih dokumenata, standarda i strategija.

- Upućen je zahtjev relevantnim institucijama i resornim ministarstvima da finansiraju pretplatu na akademske baze podataka (2014).
- Više puta u kontinuitetu podnošen je Amandman na nacrt *Statuta Univerziteta u Sarajevu*. Amandman je prihvaćen i po odredbama Statuta UNSA (usvojen 2013. godine) u čl. 90 prvi put se formira Odbor za bibliotečko informacijski sistem kao stručno i savjetodavno tijelo UNSA.
- Dostavljene su *Primjedbe na Strategiju informatizacije osnovnog i srednjeg obrazovanja u Kantonu Sarajevo 2012–2015* (2011).
- Dostavljene su *Primjedbe na Strategiju razvoja nauke FBiH za period 2011–2021* (2011).
- *Primjedbe na Minimalne standarde i normative u visokom obrazovanju u BiH* (2011 i 2014).

- Dostavljene su *Primjedbe na Standarde i normative za obavljanje djelatnosti visokog obrazovanja na području Kantona Sarajevo* (2005. i 2011).
- Dostavljene su *Primjedbe na Strategiju razvoja visokog obrazovanja na području Kantona Sarajevo za period 2010–2015* (2009).
- Dostavljene su *Primjedbe na Strategiju razvoja nauke u BiH od 2010–2015* (2009).
- Dostavljene su *Primjedbe na Pravilnik o plaćama, dodacima na plaću i naknadama Univerziteta u Sarajevu* (2006).
- Odlazak na IFLA-u (Milano 2009) u saradnji sa Hrvatskim knjižničarskim društvom.
- Prijevod *IFLA izjave o obaveznom primjerku i Izjave o djelima nepoznatog autora* (2012).
- Prisustvovanje radionicama IFLA/ALP/CLA projekta Regionalna suradnja: izazov i mogućnosti u Zagrebu (juli 2012) i Osijeku (septembar 2012) u organizaciju HKD. Zemlje učesnice su bile: Crna Gora, Bosna i Hercegovina, Hrvatska, Slovenija i Srbija. Voditeljica radionice bila je predstavница IFLA-e, Winnie Vitzansky.
- Prijevod *IFLA smjernica: Darovi za zbirke: Smjernice za biblioteke* (2014).
- Prijevod RUSA-ine smjernice za izradu bibliografije (2015).
- Prijevod standarda BAS ISO 690.
- Asocijacija BAM je član IFLA-e od 2009. godine i EBLIDA-e od 2011. godine.
- U proteklom periodu četiri članice/a BAM-a su aktivno učestvovala/a u radu Tehničkog komiteta za bibliotekarstvo BiH – BAS/TC 44 pri Institutu za standardizaciju BiH.

### Organizacija Konferencija BAM

U proteklom periodu Asocijacija BAM je održala devet međunarodnih konferencija BAM s okvirnom temom Evropske smjernice za saradnju biblioteka, arhiva i muzeja, a radovi sa konferencija objavljuvani su u zbornicima radova BAM u printanoj i elektronskoj formi, a nalaze se i u otvorenom pristupu na stranici BAM [www.bam.ba](http://www.bam.ba).

Asocijacija BAM kao organizator BAM konferencija je za svaku godinu potpisivala Sporazum o saradnji sa suorganizatorima.

Kao suorganizatori BAM konferencija pojavljuju se relevantne kulturne i naučne institucije BiH: ICOM BiH, Arhivističko udruženje BiH, Bošnjački institut – Fondacija Adila Zulfikarpašića, NUBBiH, Katedra za bibliotekarstvo



Filozofskog fakulteta UNSA, Bibliotečko informacijski centar Ekonomskog fakulteta UNSA, Gazi Husrev-begova biblioteka, Muzej Hercegovine, Narodna biblioteka Mostar, Muzej Sarajeva, Fondacija „Kemal Bakaršić”, Biblioteka Sarajeva, Zemaljski muzej BiH, Muzej grada Zenice, NUB „Derviš Sušić” Tuzla, Arhiv Tuzlanskog kantona, Zavičajni muzej Travnik, Muzej istočne Bosne Tuzla, i Opća biblioteka Zenica.

Prvi dan BAM konferencije se uvijek održava u Sarajevu, a drugi radni dan u nekom od gradova Bosne i Hercegovine.

Partneri BAM konferencija su bili: BH Telecom, Goethe institut i Ambasada SAD.

Pozvani predavači na konferencijama BAM su bili: Robert Davies, Mirna Wiler, Julia Brungs, Madel Crasta Porcella, Breda Karun, Tamara Butigan Vučaj, Zdenka Sviben, Marina Mihalić, Jadranka Lasić-Lazić, Hrvoje Stančić, Aleksandra Horvat, Biljana Kosanović, Vesna Injac Malbaša, Markus Trapp, Lambert Heller, Françoise Pellé, Zdenka Petermanec, Marijana Mišetić, Tatjana Aparac-Jelušić, Peter Hernon, Samir Lemeš, Daniela Nikolova, Martina Dragija-Ivanović i dr.

BAM međunarodne konferencije Evropske smjernice za saradnju biblioteka, arhiva i muzeja održavale su se godišnje sa centralnim temama:

- Saradnja lokalnih kulturnih institucija (BAM 2007)
- Promocija usluga za korisnike (BAM 2008)
- Partnerstvo u digitalnom dobu (BAM 2009)
- Informacijske ustanove za 21. stoljeće (BAM 2010)
- Pravne norme, standardi i preporuke (BAM 2011)
- Upravljanje znanjem (BAM 2012)
- Proaktivne obrazovne institucije – mjesto cjeloživotnog učenja u digitalnom dobu (BAM 2013)
- Kvalitet usluga i standardi (BAM 2014)
- Programi zaštite, promocije i približavanja kulturne baštine široj javnosti (BAM 2016)



*Učesnici 1. konferencije BAM 2007 u Bošnjačkom institutu*



*Učesnici 3. konferencije BAM 2009 u Bošnjačkom institutu*



*Press konferencija BAM 2010 u NUB BiH (dr Ismet Ovčina, mr Amra Rešidbegović i Biserka Sabljaković)*



*Učesnici 7. konferencije BAM 2013 u NUB BiH (mr Amra Rešidbegović, Biserka Sabljaković, Narcisa Rastoder, MA, dr Tatjana Aparac-Jelušić i dr Srećko Jelušić)*



*Slika br. 12: Učesnici 9. konferencije BAM 2016 u Mostaru*

Zaključci i preporuke sa BAM konferencija se objavljuju u Zbornicima radova i postavljaju na web-stranicu BAM-a, a obavezno se dostavljaju u pisanoj formi resornim ministarstvima, relevantnim institucijama i medijima.

Prosječan broj učesnika Međunarodnih konferencija BAM je bio od 130 do 200. Svi registrirani učesnici su dobivali certifikat o učešću. Broj prijavljenih izlagača je bio oko 30, dva do četiri pozvana predavača, 5–10 posterskih prezentacija i dvije radionice. Sve dostavljene ppt prezentacije izlagača i posterske prezentacije se nalaze u otvorenom pristupu uz programe BAM konferencija na web-stranici BAM-a. Za evaluaciju konferencije ispunjavana je anonimna anketa. Prosječna ocjena svih konferencija je uvijek bila između 4 i 4,5.

Uz nedostatak redovnog finansiranja, kao i neizvjesnost isplate (uvijek u umanjenom i simboličnom iznosu) odobrenih projekata od strane resornih ministarstava i fondacija, svake godine je sve teže kvalitetno organizirati Međunarodne konferencije BAM.

Povodom 10 godina rada (2006–2016) Asocijacija BAM dodijeljene su zlatne plakete, srebrne plakete i plakete zaslužnim institucijama, ministarstvima, sponzorima i pojedincima. Zlatne plakete dobili su: Arhivističko udruženje BiH, Biblioteka Sarajeva, Bošnjački institut – Fondacija Adila Zulfikarpašića, ICOM BiH, NUBBiH, Ministarstvo kulture i sporta Kantona Sarajevo, BH Telecom, EBSCO Publishing i 12 članova-osnivača Asocijacije BAM.

Uvjereni smo da će i muzeolozi koji su sada preuzeli kormilo Asocijacije BAM raditi sa istim entuzijazmom kao što su to do sada radili bibliotekari i postizati iste i bolje rezultate.

### **Zaključak**

Zapaženi rezultati postignuti tokom deset godina rada Asocijacije informacijskih stručnjaka – bibliotekara, arhivista i muzeologa – BAM pokazali su neophodnost i opravdanost postojanja profesionalne asocijacije, bez obzira na teškoće i prepreke na koje svakodnevno nailazi u radu. Rad u strukovnim udruženjima informacijskih stručnjaka predstavlja veliku čast i obavezu kako bi se zadovoljile profesionalne potrebe članova, kao i korisnika usluga baštinskih ustanova. Imajući u vidu izuzetno loše finansijske uslove u kojima rade baštinske institucije u BiH, bez redovnog finansiranja i riješenog pravnog statusa, Asocijacija BAM, koja takođe nema redovnu finansijsku ni tehničku podršku, zahvaljujući djelatnicima, profesionalcima i entuzijastima tih istih baštinskih institucija, organizirala je svake godine izuzetno posjećene međunarodne konferencije BAM-a. Članovi Asocijacije informacijskih stručnjaka BAM svoj profesionalni napredak i uspjeh smatraju kao obavezu, jer tako doprinose i uspjehu matične institucije u kojoj rade. Saradnja među članovima Asocijacije BAM, kao i saradnja i kontakti među udruženjima i bibliotekarima u državi, regiji i šire od neprocjenjivog su značaja za napredak u struci, prosperitet i bolji život.

**Amra Rešidbegović**

amreresidbegov@gmail.com

**Biserka Sabljaković**

biserkabic@hotmail.com

Association of Information Professionals LAM

## **A DECADE OF MISSION OF THE ASSOCIATION OF INFORMATION PROFESSIONALS – LIBRARIANS, ARCHIVISTS AND MUSEOLOGISTS IN BOSNIA AND HERZEGOVINA**

**Abstract:** The paper presents an overview of the activities of the Association of Information Professionals – Librarians, Archivists and Museologists during its first decade. An insight into the organization of the Association LAM the reasons for its founding, its mission, vision, activities, its documents, membership and results achieved during that period are presented. All that was marked by the activity of the librarians, founders of the Association LAM. It was founded and led by librarians from 2006 to 2016, when museum professionals were entrusted with the task of guiding it.

**Keywords:** association, information professionals, librarians, archivists, museologists

Примљено: 26. септембра 2017.

Прихваћено: 30. октобра 2017.